

**TEZAUUR LITURGIC**  
**4 IANUARIE**

**ACATISTUL**  
**SF. CUVIOS**  
**NICHIFOR**  
**TSANAKAKIS**  
**DE LA HIOS**



**MOSCOVA, 2000**



# Акафист преподобному Никифору Прокаженному

## Кондак 1

Избраннику Божию пречудному Никифору  
воспеваем днесь похвальная и молитвы  
приносим всеумиленные, ты же, отче  
досточудне, от всяких болезней и скорбей  
избави ны, во умилении всеусердно  
зовущих: Радуйся, преподобне Никифоре,  
молитвами твоими от страстей и недугов нас  
избавляющий.

## Икос 1

Ангелов Творец яви ты вселенней всей яко  
предстателя и молитвенника, имущего благодать  
недуги отгоняти и всякия болезни целити, сего  
ради воспеваем ти похвальная сия:  
Радуйся, ангелом сомолитвенниче;  
радуйся, собору святых сопричастниче.  
Радуйся, скорбь неисцельных болезни  
мужественне претерпевый;  
радуйся, безропотно крест страдания  
многоскорбный восприявый.  
Радуйся, всякую скорбь во уметы Христа ради  
вменивый;

радуйся, терпением твоим злокозненного врага посрамивый.

Радуйся, яко молитвами твоими исцеления нам подаются;

радуйся, яко предстательством твоим благодать изливается.

Радуйся, преподобне Никифоре, молитвами твоими от страстей и недугов нас избавляющий.

### **Кондак 2**

Видя Всеблагий Господь чистоту сердца твоего, отче преподобне, яко заступника и молитвенника о нас, прослави тя, да избегше всякаго искушения предстательством твоим, возможем купно со всеми святыми славить Бога: Аллилуия.

### **Икос 2**

Разум имуще Богопросвещен, не от человек научен был еси премудрости, но Духом Всебожественным, Иже настави тя на всякую правду и проведе тя тесным путем ко вратом Небесным, идеже ныне молитвы наши приемлещи сицевая:

Радуйся, от юности во благочестии воспитанный;

радуйся, на путь доброделания измлада наставленный.

Радуйся, родителей благочестивых отрасль  
пречестная;  
радуйся, земли Критския розго богоизбранная.  
Радуйся, от юности горесть болезни телесныя  
вкусивый;  
радуйся, во скорбех сладость молитвы обретый.  
Радуйся, Промысл Божий о себе безропотно  
приявый;  
радуйся, смирением и упованием на Бога  
всечудно просиявый.  
Радуйся, преподобне Никифоре, молитвами  
твоими от страстей и недугов нас избавляющий.

### **Кондак 3**

Сила Вышняго явлена бысть в немощи твоей,  
преподобне отче наш Никифоре, яко сам  
многонедужен сый, молитвами твоими от  
недугов свобожделение нам подаеши и научаеши  
непрестанно взывати Богу: Аллилуиа.

### **Икос 3**

Имуще щит веры непреоборим, всякия угасил  
еси стрелы вражия, искушение уныния и ропота  
преоборол еси, со апостолом восклицающе: вся  
могу о укрепляющем мя Иисусе! Темже укрепи  
нас, многонемошных, и от искушений лукавых  
свободи всех, воспевающих тя сице:  
Радуйся, волю Господню о себе всецело

исполнивый;  
радуйся, венец мученичества бескровного  
приявый.  
Радуйся, Путем Господним присно ходивый;  
радуйся, многих от путей погибельных  
отвративый.  
Радуйся, от печали временныя в радость вечную  
восшедый;  
радуйся, вожделеннаго Небеснаго Отечества  
достигнувый.  
Радуйся, Светом Невечерним озаренный;  
радуйся, Славою Божией просвещенный.  
Радуйся, преподобне Никифоре, молитвами  
твоими от страстей и недугов нас избавляющий.

#### **Кондак 4**

Бурю искушений всезлых врага древняго  
утишил еси, отче, и потопил еси, яко египтяны,  
помыслы уныния и отчаяния в море слез твоих,  
егда в молитве непрестанно взывал еси  
Господу: Аллилуиа.

#### **Икос 4**

Слышавше в сердце своем призыв Христов,  
притекл еси к преподобному Анфиму, от него же  
и приял еси пострижение во образ ангельский,  
да причтен явишися лику преподобных отцев, с  
нимиже ты воспевающе, усердно взываем:

Радуйся, вся красная мира сего во уметы  
вменивый;  
радуйся, путь тесный жития монашескаго  
избравый.  
Радуйся, плотския страсти поправый;  
радуйся, добродетельми душу свою украсивый.  
Радуйся, всякую суету и страстей течение  
отринувый;  
радуйся, чистоту и богомыслие паче всяческих  
возлюбивый.  
Радуйся, иноческаго жития ревнителю;  
радуйся, отцев древних подражателю.  
Радуйся, преподобне Никифоре, молитвами  
твоими от страстей и недугов нас избавляющий.

### **Кондак 5**

Боготечная звезда явился еси всем во обители  
Хиосстей сущим и недугами горькими  
одержимым, отче преподобне, образ сим являя  
долготерпения, смирения и всеблагаго на волю  
Божью упования. Темже молим тя, и наша  
души, скорбьми обремененныя и страстьми  
телесными и душевными одержимыя, просвети  
светом добродетелей, да всерадостно воспоим  
Богу: Аллилуиа

## **Икос 5**

Ведяще души твоея доброту и житие твое непорочное, преподобный Анфим призва тя на подвиг певческий, да сердцем и усты приносяще Богу славословие и моление, ходатай явишися о людех православных, иже тя словесы сими ублажают:

Радуйся, благодатию Господнею осененный;  
радуйся, Божиих дарований исполненный.

Радуйся, свеще, молитвой пламенеющая;  
радуйся, кадильнице, добродетельми благоухающая.

Радуйся, кимвале краснозвучный, милости Божия нам возвещающий;  
радуйся, кампане златокованный, к молитве и песнопению нас созывающий.

Радуйся, Господеви песнь всерадостно приносивый;

радуйся, Всемиловитую Богородицу в молитве прославивый.

Радуйся, преподобне Никифоре, молитвами твоими от страстей и недугов нас избавляющий.

## **Кондак 6**

Проповедник неустанный милостей Божиих явился еси, отче преподобне Никифоре, в брэнном и многоболезненном телеси своем язвы Господа Иисуса носяще и являюще всем, яко в

немощи твоей сила Божия совершается, в подвиге ты укрепляющая и подающая силы непрестанно взывати: Аллилуиа.

### **Икос 6**

Возсиял еси людем православным яка лампада всесветлая, освещающая путь жития земнаго и отгоняющая от душ наших мрак отчаяния и уныния, яже изжени молитвами твоими, да возможем Господа нелестно славословити и ты, отче преблаженне, воспевати неленностно:

Радуйся, огнем Божественным всеразженный;  
радуйся, светом Истины осиянный.

Радуйся, росе, еюже огонь искушения и соблазнов угашается.

Радуйся, морю, имже зловерие потопляется.

Радуйся, уныния стрелы всеразженные  
молитвами твоими отражающий;  
радуйся, всезлое коварство врага древняго  
разрушающий.

Радуйся, яко тобою всякое отчаяние далече отгоняется;

радуйся, яко предстательством твоим радость  
небесная верным подается.

Радуйся, преподобне Никифоре, молитвами  
твоими от страстей и недугов нас избавляющий.

## Кондак 7

Хотяще явити тя всей вселенней яко предстателя теплейшаго и молитвенника о людех православных всеусерднаго, Всеблагий Господь управи исхождение твое от лепрозория хиосскаго в лечебницу близ Афин, да и тамо сущим людем образ явишися терпения в болезнех и научиши всех скорбящих на Господа уповати и непрестанно взывати: Аллилуиа.

## Икос 7

Новаго Иова многострадальнаго зрим тя, отче преподобне, не похулил бо еси в болезни твоей Господа и не отверзл еси уста твоя, во еже поучатися тщетным, но посреде скорбей, якоже оный на гноищи, непрестанно взывал еси: буди Имя Господне благословенно. Темже и мы, тепение твое похваляюще, взываем сице:  
Радуйся, терпения столпе непоколебимый.  
Радуйся, смирения и послушания адаманте всекрепкий.  
Радуйся, лишением зрения умныя очи души своя просветивый;  
радуйся, язвами телесе своего диавола уязвивый.  
Радуйся, в ризу смирения себе одеявый;  
радуйся, порфирию добродетелей душу свою украсивый.

Радуйся, немощь естества своего Силою Божиею  
превозмогающий;  
радуйся, образ терпения посреде болезней нам  
являющий.

Радуйся, преподобне Никифоре, молитвами  
твоими от страстей и недугов нас избавляющий.

### **Кондак 8**

Странствие жития земнаго богоугодне  
совершив, подвигом добрым подвизался еси,  
веру соблюл еси, страдания и скорби Христа  
ради претерпел, темже, венец мученичества  
бескровного приявше, во обителях Небесных  
водворился еси, идеже не престаеши воспевати  
Господеви: Аллилуия.

### **Икос 8**

Всем воистину помощник являешися,  
притекающим к твоему пречудному  
заступлению, преподобне отче Никифоре,  
коеждо моление скоро слышаще и исполнение  
прошения на пользу подающе. Темже и наших  
молитв не отвратися, но милостию твоею  
заступи всех, вопиющих ти таковая:  
Радуйся, любящим тя скорое вспоможение.  
Радуйся, немощных благое заступление.  
Радуйся, непрестанно о всех молитвы  
приносящий;

радуйся, о память твою совершающих присно ходатайствующий.

Радуйся, яко тобою от напастей избавляемся;  
радуйся, яко тобою благодати сподобляемся.

Радуйся, яко предстательством твоим жизнь вечная обретается;

радуйся, яко молитвами твоими вера истинная познавается.

Радуйся, преподобне Никифоре, молитвами твоими от страстей и недугов нас избавляющий.

### **Кондак 9**

Всякия избави нас напасти и болезни наша исцели, отче наш богомудре Никифоре, ты бо присно предстоиши Престолу Божию и молишися о всех нас, память твою светло совершающих и ты в помощь и заступление призывающих, непрестанно Богу взывающе: Аллилуиа.

### **Икос 9**

Витии многовещаннии по долгу не возмогут воспети чудеса твоя, отче треблаженне, в годину бо лютаго поветрия морового являешися людем православным и от гибели напрасныя избавляеши, исцеление всем подаеши и молитвами твоими заступаеши всех, похвалы сицевыми ты прославляющих:

Радуйся, чудес источниче неистощимый.  
Радуйся, исцелений кладезе неисчерпаемый;  
радуйся, целителю и заступниче наш  
пречудный;  
радуйся, о людех православных молитвенниче  
предивный.  
Радуйся, стено, верных ограждающая;  
радуйся, звездо, путь ко Христу показующая.  
Радуйся, сосуде, благодатию преисполненный;  
радуйся, ковчеже, дарами духа всеукрашенный.  
Радуйся, преподобне Никифоре, молитвами  
твоими от страстей и недугов нас избавляющий.

### **Кондак 10**

Спасение испроси всем и грехов разрешение,  
отче всеблаженне, таже болезней исцеление и  
скорбей ослабу подаждь нам, Никифоре  
преподобне, память твою верою совершающим  
и о тебе пение Богу благодарственное  
приносящим: Аллилуиа.

### **Икос 10**

Стеною многомогущаго предстательства твоего  
огради нас от всякаго зла и болезни душевныя и  
телесныя избави люди православныя, иже песнь  
приносят ти сицевую:  
Радуйся, любящим тя скорое вспоможение.  
Радуйся, немощных благое заступление.

Радуйся, молитвою твоею нас укрепляющий;  
радуйся, предстательством твоим от бед нас  
избавляющий.

Радуйся, любовью своею всех нас обнимающий;  
радуйся, никого же скорбящим оставляющий;  
радуйся, огнем благодати сердца верных  
воспламеняющий;

радуйся, пламень злобы адския тайнодейственно  
угашающий.

Радуйся, преподобне Никифоре, молитвами  
твоими от страстей и недугов нас избавляющий.

### **Кондак 11**

Пение твое приявый Господь Вседержитель,  
ныне приемлет и моления твоя, яже приносиши  
о всех, в болезнях, напастех и обстояниях сущих,  
отче всеблаженне Никифоре. Темже, на помощь  
и заступление твое уповающе, с верою и  
благоговением Богу молитвы приносим,  
вопиюще: Аллилуиа.

### **Икос 11**

Светозарное Правды Солнце, Христос Бог наш,  
сущим во тьме греховней дивное светило  
великое яви тя, отче всеблаженне, светом  
благодати Божия сияющее и путь доброделания  
всем освещающее, сего ради молимся: исцели  
ны от всякия болезни душевныя и телесныя, да

сподобимся пети ти:

Радуйся, Светом Невечерним озаренный;

радуйся, Славою Божией просвещенный.

Радуйся, скорбныя мглы отгонителю;

радуйся, болезней и напастей потребителю.

Радуйся, радуйся всякия правды исполненный;

радуйся, добродетельми светло преукрашенный.

Радуйся, яко предстательством твоим мир с Богом обретаем;

радуйся, яко путем твоим к Небеси восходим.

Радуйся, преподобне Никифоре, молитвами твоими от страстей и недугов нас избавляющий.

### **Кондак 12**

Благодати Божией источник неоскудеваемый являеши всем верным преподобне отче

Никифоре, являеши бо людем православным и токи исцелений изливаеши на всех, с верою к тебе прибегающих и тобою Господу молитву приносящих: Аллилуиа.

### **Икос 12**

Поюще Бога, Дивнаго во святых Своих, похвалы всяческая приносим ти, преподобне отче

Никифоре, молитвенниче о нас усердный и заступниче наш всечудный, и единым сердцем величаем тя, глаголюще:

Радуйся, скорби и болезни телесныя ни во что

же вменивый.

Радуйся, терпением твоим узы диавольския  
сокрушивый.

Радуйся, путь к небеси нам присно указующий.

Радуйся, благословением твоим нас ныне  
осеняющий.

Радуйся, крепкое ограждение от находящих на  
ны искушений;

радуйся, нетрудное отгнание напастей и  
скорбей.

Радуйся, врачу благодатный, телесем нашим  
здравие подающий;

радуйся, душам нашим спасение  
исходатайствующий.

Радуйся, преподобне Никифоре, молитвами  
твоими от страстей и недугов нас избавляющий.

### **Кондак 13**

О предивный угодниче Христов, преподобне  
отче наш Никифоре, прими немощное пение  
сие, от любви нашея возсылаемое ти, и моли  
Господа и Владыку всяческих избавити нас  
душевреднаго прилога вражiego, да спасение  
вечное улучивше, песнь с тобою боголепно  
воспоим: Аллилуиа.

[Этот кондак читается три раза, а затем икос 1 и  
кондак 1]